

DISSERTATIO INAUGURALIS MEDICA
DE
MORBIS
HAEREDITARIIS
IN GENERE

QVAM
SVMMI NVMINIS AVSPICIO
RECTORE MAGNIFICENTISSIMO
SERENISSIMO PRINCIPE AC DOMINO
DOMINO
FRIDERICO
MARGGRAVIO BRANDENBVRGICO BORVSSIAE
SILESIAEQVE DVCE CET. BVRGGRAVIO NORIMBERGENSI CET.
CIRCVLI FRANCONICI SVPREMO CAMPI MARESCHALLO
ET TRIVM LEGIONVM ET COHORTIVM PRAEFECTO

EX DECRETO GRATIOSAE FACVLTATIS MEDICAE
PRO GRADV DOCTORIS
SVMMISQVE IN MEDICINA HONORIBVS IVRIBVS
AC PRIVILEGIIS LEGITIME OBTINENDIS
PVBlico ERVDITORVM EXAMINI
SVBMITTIT
IOANNES PROCOPIVS
SZAKOLCZA HVNGARVS.

DIE OCTOBR. MDCCLVIII.

ERLANGAE
APVD IO. DITER. MICH. CAMERARIVM ACADEM. TYPOGR.

LVCRETIVS

de rer. natur.

L. III. v. 307.

*Sic hominum genus est! quamvis doctrina politos
Constituat pariter quosdam; tamen illa relinquit
Naturae cuiusque animae vestigia prima,
Nec radicitus euelli mala posse putandum est.*



§. I.

Certa quadam atque definita partium, massam sanguineam constituentium, proportionem, humores nostros gaudere, ne vetustissimos quidem medicos latuit, quam illi, si a statu sano atque naturali non recedebat, *temperiem* adpellarunt. Quam ob causam, varia etiam corporibus attribuebant temperamenta: quum a diuersa sanguinis temperie, varias quoque qualitates, humana corpora nanciscantur, quarum causa, certo temperamento, praedita dicebantur. Et illae quidem primae seu simplices qualitates, ex eorum opinione, quatuor sunt: calidum, frigidum, humidum, siccum.

§. II.

Quae simplices seu primae qualitates (§. I.) quum solae, salua hominis vita, consistere in corpore non possent, vt recte HIPPOCRATES iudicasse videtur a); calidumque adeo humido, et humidum calido cet. mixtum atque temperatum esse oporteret:

A 2

quatuor

a) de veteri medic.

IV DE MORBIS HAEREDITARIIS

quatuor primaria temperamenta, ex primis illis qualitatibus, quae composita essent, veteres constituerunt medici. Nimirum, calidum et humidum, quod *sanguineum* vocarunt; deinde calidum et siccum, quod *cholericum* dixerunt; tandem, frigidum et humidum, cui nomen *phlegmatici* erat; postremo autem frigidum et siccum, quod *melancholicum* nuncuparunt.

§. III.

Sed, quum animaduernerent, quatuor ista temperamentorum genera (§. 2.) haud adeo vniuersalia esse, ut eorum vnum, cuiuslibet indiuiduo ita competeret, ut ne latum vnguem, a simplicitate sua, recederet; summamque temperamentorum diuersitatem, in singulis propemodum hominibus, viderent; alias adhuc temperamentorum species, quae ex prioribus quodammodo compositae essent, doctrinae causa, excogitauerunt, ut sunt: sanguineo-cholericum, sanguineo-melancholicum, sanguineo-phlegmaticum. Quin, placuit nonnullis, multis competeret hominibus temperamenta, quae ex tribus conflata commixtaque essent, ut, sanguineo-cholericum-melancholicum.

§. IIII.

Displicuit equidem nonnullis, composita temperamenta (§. 3.) statui, propterea quod e diametro eadem sibi opposita essent, neque in vno eodemque indiuiduo stare possent, sic, ut, vno simplici posito, alterum necessario tollatur. Dicunt namque, si calidum et frigidum, humidum et siccum, simul consistere non possit: neque etiam fieri posse, ut vnus idemque homo temperamenti v. gr. sanguinei, cholericique simul esse queat: illud si quidem humidi abundantiam, hoc autem eius inopiam inuoluat (§. 2.)

§. V.

Sed, si iusto sensu, composita temperamenta intelligamus: nihil huic sententiae absurdi inesse, quisque comperiet. Non illam fuisse huius opinionis auctoribus mentem existimo; ut, cum v. gr. sanguineo-cholericum temperamento, aliquem praeditum

ditum esse dixerint: eundem et abundare et egere simul humido, putauerint. Doctrinae huius ratio cum iusta, tum etiam omni ex parte veritati conueniens, illis fuisse videtur. Neque enim cogitandum est, primaria temperamenta (§. 2.), quatenus corpori humano conueniunt, certos adeo atque definitos habere limites; ut eos nullo vnquam tempore transgredi, nullosque admittere gradus possint. Abundare quidem humidum potest cum calido: illud tamen, minori copia, quam in sanguineis esse solet; quin adesse possit, nihil est, cur dubitare debeamus. Si ergo humidum, minori, aut calidum, maiori, ac in sanguineis solis, copia adest, illo tamen paulo maiori, quam in solis cholericis, calore porro, abundante: tale temperamentum ex sanguineo atque cholericum mixtum dici potest; quum vtriusque naturam, quadam parte, imitetur. Qua significatione, si caetera quoque temperamenta sumamus composita: omnis tolletur dubitandi occasio.

§. VI.

Tanto autem minus vulgaris illa medicorum opinio, de compositis temperamentis, aliena a vero videtur: quanto maioribus mutationibus, omnium hominum temperamenta, obnoxia esse putantur. Aetate enim, victus ratione diuersa, vitae genere regionumque incolatu commutato, diuersis anni temporibus, et varia aëris coelique temperie, sexcentisque aliis, eadem mutari, qui inficietur, existimo fore neminem. Atque inde etiam factum est, ut certis hominum *aetatibus*, quaedam quasi propria temperamenta adscribantur; infantibus et pueris phlegmaticum, sanguineum iuuentuti, cholericum viris, senibus denique melancholicum; non, quod simplicia temperamenta ista, certis aetatibus, sine aliorum complicatione, adstricta essent; omnesque, qui, eadem aetate, sunt, iisdem quoque temperamentis gauderent; sed, quod, quibusdam vitae humanae temporibus, quaedam temperamenta manifestissima sint, caeterisque quasi dominantur. Quin imo eo usque, philosophando progressi sunt quidam, ut,

VI DE MORBIS HAEREDITARIIS

vniuersis nationibus, propria attribuerint temperamenta, veluti fuit SCIPIO CLARAMONTIVS CÆSENAS b) tametsi is, non tam de corporis, quam animae temperamento scripsisse videatur. Cuius non eam fuisse opinionem arbitror, vt eiusdem regionis incolis, ideam attribuat temperamentum stricte et absolute; sed, quod ad vnum temperamentum magis, quam aliae gentes, accedant. Visum etiam non nullis est, in sancendis legibus, vniuersarum gentium temperamenta considerata esse, id quod nuper etiam demonstrauit Cel. Montesquieu. c)

§. VII.

Hanc ob causam, quum clarissimi medici, tam insignem, ac propemodum infinitam temperamentorum varietatem, propter tantam hominum dissimilitudinem, et singulorum indiuiduorum singularem constitutionem, rerumque, quibus illa in varias species transformantur, multitudinem, viderent: tot fere temperamenta animo concipienda esse iudicarunt; quot mortales, in vniuerso terrarum orbe, vnquam fuerunt, sunt aut erunt, cuilibet indiuiduo, proprium ac singulare temperamentum attribuentes d).

§. VIII.

Quum a sicco humidoque (§. I. 2.) fibrarum dependeat robur aut mollities: e) per se iam elucescit, temperamentorum notiones, non tantum ex fluidorum qualitatibus, sed etiam solidorum constitutione, eruendas esse. Quodsi itaque a certa quadam sanguinis qualitate, et solidorum tono, certa quoque omnium actionum functio, hinc totius corporis constitutio dependet:

b) de coniectandis cuiusque moribus et latitantibus animi affectibus, conf. Thomae Kennedy diss. de temperamento fundamento morum et morborum in gentibus, sub praesidio FRID. HOFMANNI, Halae 1708. ventilata.

c) in notissimo opere *Esprit de Loix*.

d) FERNELII *Physiol.* Lib. III. c. 3. p. m. 121. Io. GOTTOF. de BERGER *physiol. medic.* p. 109. HAMBERGERI *physiol. medic.* §. 49.

e) HAMBERGERI *physiol. medic.* §. 52. seqq.

pendet: tono fibrarum, et sanguinis qualitate mutatis, corporis quoque constitutionem omnem mutari, necesse est. Proindeque, quia temperamenta, tam variis a causis diuersoque modo, mutantur (§. 6. 7.): ab iisdem quoque corporis statum praesentem mutari oportet.

§. IX.

Quum ex sanguinea massa, caetera corporis nostri fluida secernantur: sequitur, qualis est sanguis, talia quoque fluida ex eodem secreta esse oportere. Quamobrem, quia masculinum quoque semen fluidum est, ex sanguine originem trahens suam: semen hoc, imitari, quodam modo, debet qualitates sanguinis, ex quo illud secretum est.

§. X.

In hoc consentiunt medici, corporis temperamenta, per morbos mutari, id est, proportionem partium sanguinem constituentium, earumque mutuam in se solidasque partes, et vice versa, actionem, in aliam, quam ante morbum fuit, degenerare, aliasque adeo sanguinem adipisci qualitates. Quoniam igitur masculinum semen ex sanguine secernitur; ideoque similibus paene qualitatibus massae sanguineae, praeditum est (§. 9.) intelligere hinc licet, si sanguis minime sanus est, sed omnino morbosae qualitatis; masculinum semen, vitii sanguinis naturam imitari. Quod ipsum pridem iam monuit Hippocrates, f)

§. XI.

Non hic disquiremus, an muliebri ouum, ipsa virilis seminis substantia, vel animali spasmatice, vel vero aura senimali, prolificum fiat atque foecundetur. Sufficere enim videtur, quandam seminis masculini partem, ad oui muliebris foecundationem concurrere. Constat porro, materno sanguine, toto gestationis tempore, foetum, in vtero nutriri; arctissimumque nexum matrem inter foetumque intercedere, quem etiam *Illustris de*
HALLER

f) de morbo sacro Cap. III.

HALLER, g) satis luculenter demonstravit; ut adeo, qui hunc nexum negare videntur, nihil aliud sentiant, quam, quod novitatis studium redolet. Proindeque, quo pater aut mater, ipso generationis momento, temperamento gaudebat: idem quoque siue sit laudabile, siue morbosum, rudimentis concepti in utero foetus innascetur atque communicabitur.

§. XII.

Metuendum non est, ut ex hac sententia (§. II.) sequatur, omnes homines eodem temperamento, esse. Quod si enim, tam variis rebus, temperamenta mutantur, (§. 6. 7.), ut, ne vno momento quidem, eadem suique similia permaneant: facile hinc concipere licet, cur interdum liberos, diverso a parentibus, corporis temperamento, esse contingat, variosque singulorum prope modum parentum liberos, diverso et singulari temperamento gaudere videamus.

§. XIII.

Quoniam eadem fluidorum qualitas, liberis, per generationem, a parentibus traditur, qua ii, generationis tempore, gaudebant (§. II.); et fluidae partes sunt solidarum nutrimentum: dubitare non licet, quin, per generationem, solidarum quoque partium, conformatio, robur, caeteraeque qualitates, a parentibus in liberos propagentur.

§. XIII.

Si ergo et fluidarum (§. II.) et solidarum partium (§. 13.) qualitates, liberis tradunt, per generationem, parentes; a fluidorum vero mixtione ac temperie, a solidarum tono et conformatione, corporis illa constitutio, ob quam, homines, aut sani vegetique, aut valetudinarii sunt, dependet: fieri secus nequit, quam, ut talem corporis constitutionem, parentes, per generationem, liberis communicent, quali ipsi, generationis tempore, gaudebant, seu illa sana, seu valetudinaria fuerit. Quam ego quidem *Haereditariam dispositionem in genere*, adpellabo.

§. XV.

g) Praelect. Boerhaav. Volum. V. part 2. p. 263. seq.

§. XV.

Experientia ipsa rei veritatem euincit. Sic, a robustis fanisque parentibus, robustam quoque ac vegetam sobolem, ab infirmis vero et valetudinariis, imbecillam progenerari vulgo videmus. Norunt etiam omnes, faciei lineamentorum, capillorum, barbae, oculorum coloris, totiusque corporis habitus similitudinem, liberos, a parentibus, plerumque accipere. Quin etiam, GALENI testimonio h), *non solis parentibus, sed proavis etiam quibusdam, foetus redduntur similes*; quod in primis in *Afris Indisque* manifeste conspiciamus, quibus, nasus simus esse solet, labia crassa et quasi inflexa. Cuius quidem rei ratio non alia esse videtur, quam haereditaria quaedam dispositio.

§. XVI.

Notum etiam in vulgus est, quasdam familias, aliis longe viuaciores esse, quasdam autem perpauco numerare cognatos, qui longam vixissent aetatem. Hoc quoque a quibusdam animaduersum est: quod morbi alioqui benigni, sua natura, quibusdam familiis, maligni, imo lethales, euaserint. Haec omnia a dispositione haereditaria proficisci, optimo iure, adfirmare possumus; per quam, tam firmum robustumque corpus, a parentibus accipiunt liberi: ut, aut nullis grauioribus morbis tententur, aut superuenientes, facile vincant ac superent. Neque vero simile videtur, vitae tam longae causam, certo vitae generi, aëris coelique elementiae optimaque diaetae, vnice adscribendam esse: partim, quod, licet ad eandem familiam pertinentes, diuersum sequantur vitae genus, si haec viuax sit, paene omnes ad seram viuere aetatem soleant; partim, quod videamus, grauiissimos, plerosque homines, in victu errores admittere, nihilo minus tamen non paucos, qui temperanter et moderate vixere, aetate superare. Quamquam minime dubitem, quin, si eiusmodi homines, qui corpus ad vitam longam viuendam idoneum nacti sunt, temperantiae essent studiosiores: multo maiorem

B

aetatem

h) de Theriaca ad Pisonem p. m. 115.

aetatem possint attingere. Quapropter, dum in vitae robur, signaque ex illo petenda, inquirere iubet magnus ille BOERHAVIUS, rectissime iudicasse videtur, i) *e familia aegroti petendas conclusionum rationes esse.*

§. XVII.

Non diffiteor, non semper contingere, ut parentes, similem sui sobolem progenerent: sed haec natorum et parentum dissimilitudo, non est sufficiens argumentum, ad negandam haereditariam dispositionem; quum liberi parentum similes esse potissimum soleant. Quod non tantum in hominibus, verum in brutis etiam animadvertere licet; maxime autem, si diuersae speciei animalia, generationis actum exerceant. Cuius rei luculentum praebent documentum, foetus, quorum parentes sunt diuersae speciei animalia, ut, *muli.*

§. XVIII.

Contra autem ea, varia exempla commonstrant, dispositionem haereditariam minus salubrem, ita saepe mutari posse; ut robustissimis parentibus prognati tales liberi videantur. Sed hoc, mutato vitae generi in melius, et exquisito victui, atque adeo arti, adscribendum est. Nam communis docet observatio, et praematura, et prouecta aetate, prognatos liberos, cum animo, tum etiam corpore, debiles ac effeminatos esse consuesse: nisi omnino, singulare corporis robur, parentes possideant, minus apta aetate, liberis operam nauantes. Ita quoque septimestres infantes, qui natura sua debiles ac infirmi sunt, arte atque industria, eximium saepe robur nanciscuntur. k)

§. XVIII.

Atque talem corporis constitutionem, qua liberi, quoad statum sanum atque naturalem, similes sunt parentibus, *dispositionem haereditariam naturalem*, seu ad sanitatem, appellare possemus.

§. XX.

i) Institut. medic. § 947.

k) Vid. *Illustris D. DELII Prof. Erlang. Fränkische Sammlungen* Vol. I. part. 5. p. 463.

§. XX.

His ita constitutis, proximum est, ut ad ipsum meditationis meae argumentum, me conuertam. Quod tametsi tritum et vulgare videatur: tot tamen opiniones de causis et natura haereditariorum morborum, inueneris, quot auctores, in hoc argumento, versati sunt. Quamquam igitur, qui de morbis haereditariis scripsere, et multi sint, et maximae inter multos auctoritatis: hoc tamen potissimum scribendi argumentum elegi, non, quod satis conueniens rei tam arduae tamque difficili, quae multorum clarissimorum virorum ingenia exercuit, genus scribendi meum, existimem; sed, ut, partim laudabili maiorum instituto, partim amicorum desiderio, satisfaciam. Ita autem hac in re versabor, ut *morbos haereditarios actu primum existere* demonstrem; deinde vero, *naturam eorum causasque*, pro virium mearum ratione, exponam; ac proptremo ea, *quae ad diagnosin, prognosin, curationemque horum morborum pertinere* videntur, succincte breuiterque explicem. Quod ut bene ac feliciter aedat, supremum Numen, sapientissimum iuxta atque potentissimum naturae humanae rerumque omnium patrem atque auctorem, submissa deuotaque mente, veneror. Cuius auxilii spe atque fiducia fretus, ipsam iam rem, de qua scribere decreui, adgredior.

§. XXI.

Principio itaque tractationis, esse morbos haereditarios, in rerum natura, ostendendum est. Video namque esse quosdam, qui in contrariam sententiam abeant; dubitentque adeo, morbos haereditarios ullos esse, iis exceptis, quibus interdum adfecti infantes nascuntur, quosue nos connatos dicemus (§. 40.). Quorum argumenta ut refellamus, instituti nostri ratio postulat. Quod quidem, tanto minoris, opinor, laboris futurum est: quia aduersariorum argumenta, sponte quasi corruunt, vix certo stabilique aut rationis, aut experientiae fundamento innixa.

§. XXII.

Ante annos non multos, praemiis sollicitauit viros doctos et medicinae peritos *Diuinionensis* apud Gallos academia; vt certis rationibus doceant modum, quo morbi haereditarii propagantur. Louisius itaque, nouae proponendi opinioni occasionem nactus, Gordium hunc nodum, vt quondam M. Alexander, ense soluit, morbis haereditariis in dubium vocatis, aut potius prorsus negatis 1). Cuius rei hanc primo adfert rationem: *Experientiae refragari, ouo materno, in quo foetus rudimenta sunt, parentum morbos per generationem tradi. Id enim si verum esset: morbos et valetudinarii parentes, sanam et vegetam sobolem, progenerare non possent; neque coeci, surdi, gibbosi, incolumibus visus et auditus organis, decentique spinae conformatione, praeditam.*

§. XXIII.

Equidem non diffiteor, morbos parentibus, sanos liberos nasci posse; in primis, si aut pater, aut mater, optima fruebatur valetudine: ex eo tamen minime sequitur, nullos prorsus haereditarios morbos esse. Primo enim non semper ab utroque parente, sed plerumque, ab alterutro duntaxat, haereditariam dispositionem, liberi accipiunt: quoniam modo patris, modo matris externam corporis formam referunt. Deinde vero arte ac solerti educatione, corrigi potest interdum haereditaria dispositio (§. 18.). Ac postremo, si haereditaria dispositio inesse corporibus potest, sine conspicuis morbi alicuius indicis: verum quoque erit, valetudinarios parentes ingenerare posse liberis morbi sui semina ac principia; quamquam hi nunquam manifesto morbo eiusmodi laborauerint; si praesertim, omni ratione, caueant et prohibeant, ne morbosa dispositio, in veros morbos erumpat.

§. XXIII.

Quando autem ad coecos, surdos, gibbosos prouocat: non ea est nostra opinio, ac si semper parentum imaginem, exacte

1) Dissertation sur la question: *Comment se fait la transmission des maladies hereditaires* par Mr. Louis, a Paris 1749. 12.

exacte referre debeant liberi, eademque, qua parentes, morbi specie adfici, sufficit haereditarios morbos adfines interdum esse solere. Porro meminisse oportuit virum doctissimum, morbos organicos, non confestim oriri, nisi externa iniuria visque accesserit: sed, tardo pede, fluidorum solidorumque vitia posse sequi. Ad haec sciendum est, non omnes morbos organicos tales esse, qui, per generationem, propagari possint: quia resecti nasi vel cultro effossi oculi, causa, est vis externa, non interna morbosaque, quae in humoribus latere queat. Verum tamen eo usque dispositionem haereditariam morbosam procedere, ut etiam organicae partes vitentur, non sine exemplo est: siquidem haud ita pridem, *Illustrem D. DELIVM*, vir iuuenis consuluit, qui iam notabili visus obscuritate adfectus est, cuius pater senectuti adpropinquans coecus evasit, non ob aetatis gravitatem, sed aliam causam internam.

§. XXV.

Alterum *Louisii* argumentum est: multos nasci homines, quorum parentes licet incolumes fuerint sanique, morbis tamen confidentur, qui falso pro haereditariis habiti sunt; adeoque meliori iure adquisitivos, quam haereditarios, dicendos esse; quoniam ad morbos, qui vulgo haereditarii dicuntur, externae quoque causae concurrunt. Nos autem duo hic monemus, primum est, ut probet aduersarius, eiusmodi parentes, ne haereditariam quidem dispositionem habuisse ad morbum, quo eorum liberi correpti sunt. Alterum vero est, ne quis existimet, eos morbos, qui haereditarii putantur, secus non, quam per haereditariam dispositionem, oriri posse.

§. XXVI.

Inquit porro, quum liberi iisdem parentibus prognati non semper eiusdem sint temperamenti: illos, non posse, suis liberis, ingenerare dispositionem morbosam. Sed vero vanitas huius argumenti illico adparebit: si eorum, quae (§. 11. 12.) dicta sunt, meminerimus.

XIV DE MORBIS HAEREDITARIIS

§. XXVII.

Quod denique minus probabile ipsi videatur, haereditariam dispositionem, multis annis, sepultam ac quasi mortuam latere posse, absque ullius morbi vestigiis: profecto miror. Probe scire doctissimum aduersarium existimo, dispositionem haereditariam, ad causas morborum remotiores, in scholis medicis, referri solere; eandemque adeo, per se propriaque sua vi, sine aliarum causarum concursu, morbum producere non posse. Qui medicinam faciunt, experti adfirmant, scirrhus, plurimis annis, sui similes perseverare posse, neque in prava carcinomata degenerare. An igitur iure quodam negandum est, eos, qui scirrhum habentes, maligno carcinomate diuexati non sunt, dispositionem quandam ad cancerum non habuisse. Multae profecto sunt causae, quas oportuno loco enumerare non intermittam, cur haereditaria dispositio, sero semet interdum, per morbum, manifestet; interdum vero plane in neruum non erumpat; utique, si omnes causae procatareticae sollicitè euitentur. (§. 18.)

§. XXVIII.

Illud autem perpendant; velim, qui in contrariam sententiam abeunt, foetum in utero adhuc latentem, ipso materno sanguine, per vasa umbilicalia, fluente ac refluxante, nutriri. Si itaque mater, generationis aut etiam grauiditatis tempore, morbo aliquo laborauit, cuius praecipua sedes massa sanguinea est: fieri secus nequit, quam, ut materni morbi semina, per sanguinem, e matre, in embryonem, transeant. Prout autem hoc sanguinis, e matre, in embryonem, translatus, vitium varii est generis: ita quoque infantes, aut citius, aut tardius, in maternum morbum, possunt incidere.

§. XXVIII.

Solam etenim morbosam matrum dispositionem, non semper sequitur morbofa infantum natiuitas: ut infantes, morbo, materno ita adfecti nascantur. Quod si enim verum est, variorum semina, a matribus, in liberos, transmitti; neque tamen omnes,

omnes, tehera infantum aetate, variolas pati, sed interdum matura adultaque iam aetate m): facile hinc intelligere licebit, non semper, eodem morbo, adfectos infantes nasci debere, quo, conceptionis aut gestationis tempore, matres laborarunt.

§. XXX.

Nolo vetustorum et recentissimorum medicorum omnium auctoritatem allegare, qui, vnanimi consensu, haereditarios morbos statuunt: ne quis, praecudicatis opinionibus, me abreptum, ad vana praesidia confugisse existimet. Actum etiam me acturum fere putarem: si aliorum obseruationes, n) quibus morborum haereditariorum existentia confirmatur, ad stabiliendam sententiam meam repeterem. Hoc tamen minime praetereundum est, obseruationibus fide dignis constare, *haemorrhoides* e. g. aliasque *haemorrhagias*, *arthritidem* eiusdemque species, *hernias*, *veneream luem*, *scorbutum*, *calculum*, *phthisin*, *hecticam*, *melancholiam*, *maniam*, a parentibus, in liberos transisse. Plura recensere superuacuum foret. ILL. DELIUS obseruasse se retulit, *guttam rosaceam*, quae per matrem, quae e gente nata erat, in qua familiaris hic morbus fuit, in liberos diuulgata est. Idem porro curae suae commissos habuit infantes lue venerea adfectos, quorum parentes eodem vitio erant infecti.

§. XXXI.

m) Vid. D. STORCHII, alias Pelargi, *Abhandlung von Blatter Krankheiten* p. 40. seqq. IVNKERI *Conspect. medic. theoretico-practicae* p. 610.

n) ILL. STAHL dissert. de haereditaria dispositione ad varios adfectus §. 35. seq. §. 45. seqq. §. 76. STORCH *Abhandlung von Blatter Krankheiten* p. 40. Vid. ILL. DELII singularis obseruatio de morbo ad catalepsin accedente, in edit. II. dissertationis de catalepsi p. 20. seq. et *Erlang. gel. Anzeigen* 1751. No. XXVI. et XXXX. Porro FERNELII *Pathol. Lib. V. c. 10. p. m. 55*. CÆL. AURELIANI *Morb. Chron. Lib. V. c. 2. p. m. 558*. nec minus dissert. inaug. de secura morborum haereditar. praeseruatione, quam D. D. HILDEBRAND, praefide III. BUCHNERO defendit §. 23. nec non ALBERTI *Lexic. medic. reale* Tom. I. p. 197. Tom. II. 487. Eiusdemque *Iurisprud. medic. Tom. I. P. 2. p. 248*.

XVI DE MORBIS HAEREDITARIIS

§. XXXI.

Postremo illud quoque sententiae meae fauere arbitror; quod maxima saepe similitudo, parentes inter atque liberos, conspiciatur; ut, vno eorum viso, alterum quoque nouisse, videre. Si igitur faciei, capillorum, oculorum color, atque lineamenta, corporis vniuersi habitus et magnitudo, statura, mores denique ipsi, et animi inclinationes atque impetus parentum, in liberos, transferuntur: eo minus inficiandum est, morbosam parentum constitutionem, liberis inprimi atque ingenerari posse.

§. XXXII.

Quum itaque ex his, quae (§. 22. ad 31.) dicta sunt, luculenter adpareat, haereditarios morbos omnino existere: proximum est, ut ad eorundem causam naturamque explicandam, ne conuertam.

§. XXXIII.

Propter eas itaque, quas superius recensui rationes, credo fore neminem, qui dubitet, liberos, parentibus, v. gr. phthisi, hectica, podagra, arthritide, etc. laborantibus, natos, ad eosdem morbos, quibus obnoxii erant parentes, plurimum propendere: quum id non modo rectae rationi non repugnet, verum crebra etiam experientia, atque observationibus fide dignissimis, confirmatur. Illam igitur corporis constitutionem, ob quam, parentum morbis, oportunissimi sunt liberi, *Haereditariam dispositionem*, eamque *praeternaturalem* seu *morbosam* adpellabo. Cuius ut nunc causam et natales explicem, ordinis ratio postulat.

§. XXXIIII.

Causa autem morbosae haereditariae dispositionis, nihil fere differt, a dispositionis haereditariae, seu *in genere* (§. 14.) *lumtae*, seu *naturalis* (§. 19.) causa. Ac proinde, quaerenda est, vel in vitiosis masculi humoribus, adeoque ipso eius semine, vel in deprauata materni sanguinis conditione. Siquidem namque masculinum semen, ex ipso secernitur sanguine; ideoque simili-
libus

libus sanguini qualitatibus praeditum est (§. 10.) intelligere hinc licet, si generationis tempore, pater valetudinarius sit, vna cum semine, paterni morbi principia, in muliebri ouum, quod ab ipso foecundatum est, atque adeo in foetum ipsum, propagari debere.

SCHOL. Illud taceo, alios quoque morbos, a matre, in feminam, etiam sine generationis negotio, sub contagii cuiusdam specie, propagari posse; vt adeo matris sanguine, a patre infecto, idem vitium in foetum traducatur. Vti etiam matris vitia, per contactum, cum patre, communicari possunt; vt ideo, viroque infecto parente, morbi in foetum propagatio haud adeo difficilis videatur. Connexionem autem, quae matrem foetumque intercedit, negare velle, idem esset, ac verum nexum inter vtrumque tollere, quem (§. 11.), vt verum, adsumimus. Vt adeo pateat, quid valeat recentissima clar. ROEDERERI opinio, hunc nexum negantis, in dissert. ad quam conscribendam, proposito ab Academia Petropolitana praemio, ineptus est, quaeque KRAVSIAE adnexa est p. 56. ad 60. *seq.* vid. infra §. 50. conf. Ill. HALLERI primae lineae physiolog. §. 857.

§. XXXV.

Quapropter, quum, per virile semen, maternumque sanguinem, paterni maternique morbi principia, in foetum ipsum transplantentur; adeoque embryones, paternae maternaeque morbosae constitutionis, participes reddantur; eademque haereditaria dispositio dicatur (§. 33.): euidens est, haereditariam dispositionem, non alia ratione, in liberos, transferri posse, quam per generationem, hincque, aut per semen virile, aut maternum sanguinem, quo concepti foetus, in vtero nutriuntur.

§. XXXVI.

Sed, age, videamus, in quonam morbosa isthaec dispositio haereditaria consistat, et, cuius naturae sit. Ad quam

quod quaestionem attinet: difficile equidem est iudicare, an ea in solidis, vel fluidis partibus, reperiatur; partim, quum videam, utrumque horum dubium suspectumque videri nonnullis, nostra aetate, viris clarissimis; partim, quod, et solidarum, et fluidarum partium vitio, diuturnos ac pertinaces adfectus, quorum numero, morbi haereditarii plerique habentur, oriri, et iudicio, et doctissimorum virorum observationibus, constat.

§. XXXVII.

Cuique notum esse opinor, pravam solidarum partium conformationem, plurimis morbis, principia praebere posse, diuersis quidem, pro ratione male conformationis partis solidae, cuius structura, naturali statui minime conueniens est. Itaque, quia solidarum quoque partium conformatio et caeterae qualitates, in liberos, per generationem propagantur (§. 13.): intelligit quisque, si pater aut mater, morbo laborabat, a solidarum praecipue partium vitio dependente; morbosam istam solidorum constitutionem, liberis ingenerare parentes; atque adeo haereditariam quoque dispositionem praeternaturalem, solidis partibus inesse posse.

§. XXXVIII.

Pro ratione temperamenti corporis, varius quoque solidarum partium tonus, cum vitalis, tum etiam physicus, esse solet. o) Quia ergo quodlibet temperamentum, determinatum solidarum partium tonum inuoluit, ut adeo, quale temperamentum est, talem quoque solidorum tonum esse conueniat; parentes vero sui corporis temperamentum, liberis ingenerant (§. 11.): quis, quaeso, est, qui dubitare possit, si quo morbo, a vitioso solidorum tono dependente, generationis tempore, parentes conflictabantur; eundem quoque tonum fibrarum non bonum, liberis innasci posse? A vero igitur alienum non est: si statuamus, haereditariam dispositionem, solidis partibus, inesse posse,

cum,

o) b. Praeceptor HAMBERGERVS in Element. physiol. medic. §. 40.
et Ill. D. DELIVS Theor. toni.

cum, quatenus sunt male conformatae, tum, quatenus decenti atque naturali tono carent.

§. XXXVIII.

Tonus et vitalis et physicus, duplici vitio laborare potest: excessu, ac tandem defectu. Illum statum, *stricturam* seu *rigiditatem*, hunc vero *Atoniam* seu *laxitatem* adpellant. Quodnam igitur horum vitiorum, haereditariam dispositionem, si ea solidis inest partibus, potissimum constituat, disquirere, erit pretium operae.

§. XXXX.

Quum, pro temperamenti ratione, varius sit fibrarum tonus physicus (§. 30.); hicque praecipue ab humido solidarum fibrae partium cohaesionem determinante *) dependeat: vero simillimum esse videtur, cum *stricturam* fibrarum, tum etiam debilitatem, a parentibus, liberis inprimi atque ingenerari posse; ut adeo certum sit, morbosum fibrarum tonum, posse haereditariam constituere dispositionem. Sic, plurimis constat observationibus, p) haemoptysin, fibrarum vasorumque pulmonalium debilitate leu atonia, natam q): quum debilia vascula, minima accedente occasione, qua pulmones extenduntur, rumpi possint.

§. XXXXI.

Possunt tamen et humores male temperati haereditariam constituere dispositionem; ut adeo fontem atque originem haereditariae dispositionis, in vitiata humorum conditione, quaerere possimus. Quod si enim solidae nostri corporis partes, ex fluidis, in quibus solidae molecule, solidorum fibras componentes, reperiuntur, suum trahunt nutrimentum: quid prohibet, quo minus credamus, in deprauatis humoribus, haereditariam delitescere dispositionem; nisi haec, in mala conformatione, sita sit?

C 2

§. XXXXII.

*) b. HAMBERGERI *physiol. medic.* §. 12.

p) D. SCHROEDERI *dissert. sub praesidio Cel. KRÜGERI ventilata, de Haemoptysi haereditaria.*

q) Ill. van SWIETEN *Comment. in aphorism. BOERHAV.* §. 26. p. m. 26. §. 44. 57.

§. XXXXII.

Inconueniens equidem nonnullis eorum opinio videtur, quicunque haereditariam dispositionem, aut in humoribus male temperatis, aut in fibrarum tono praeter naturam constituto, atonia videlicet vel strictura, ponunt. Ante enim, morbi haereditarii, haereditaria dispositione, illorum quidem opinione, orirentur, quam homo nasceretur, i. e. morbi existerent con-nati: si in fluidis haereditariae causa dispositionis reperiretur. Eadem vero si in deprauato solidorum tono lateret: multis an-nis, occulta esse haud posset; sed cito deberet morbos producere haereditarios.

§. XXXXIII.

Verum, si, acriori iudicio, rem perpendamus: adpare-bit, num quid hoc argumento commoueri debeamus. Primo autem considerare oportet, dispositionem haereditariam sua vi, morbum nullum, producere vnquam posse: nisi etiam aliae causae simul concurrerint. Deinde vero cogitandum illud etiam est, morbos haereditarios, ante aetatem, cui morbi tales pro-prii esse consueuerunt, vel finem eam praecedentis, rarius infe-stare. Quis enim vidit adeo frequenter, podagricum, aut arthriti-cum, aut phthisicum infantem: etiamsi is haereditariam ad hos morbos propensionem habere videatur?

SCHOL. Tametsi non dubitem, haereditarios morbos, illegitimos plerumque esse, hoc est, nec sexui, nec aetati conuenientes, imo ipse etiam statuam: tamen, certum quendam seruare ordinem videntur. Oriuntur enim co-tardius, quo moderatius vixit aeger: citius tamen, quam, sine haereditaria dispositione, contigisset. Et, si ante le-gitimam aetatem, semet manifestant: id tamen accidit sub finem aetatis eam praecedentis, cui morbus talis proprius est seu legitimus. Sic, podagra si legitimus est morbus: senes affligit virosque. Eadem vero, si haereditaria sit, adeoque illegitimus morbus: virilem atque etiam iuuenilem aetatem

actatem infestat, ac praesertim illum iuuentutis terminum, qui virili aetati proximus est.

§. XXXXIII.

Si itaque haereditaria dispositio sola, nequit producere morbum; neque morbi haereditarii, ante certam aetatem, erumpunt (§. praeced. Schol.): sequitur, ut, siue haereditaria dispositio, in fibrarum atonia, siue in strictura, siue in mala fluidorum temperie, consistat; ipse morbus propagari vix possit, priusquam superuenerit aetas, morbo illi, ad quem haereditaria quaedam propensio ingenita homini est, propria, causaeque accesserint, quae haereditariae dispositionis potentiam augeant, et latentem quasi morbum excitent. Quamobrem satis clarum cuique esse confido, solidis fluidisque partibus, haereditariam dispositionem inesse posse, latente etiam morbo; neque inde consequi morbos connatos oportere (§. 42.).

§. XXXXV.

Placuit autem nonnullis ex aduerso, in fibrarum teneritate, haereditariam dispositionem ponere. Quod ne vero quidem simile videtur: quum fibrae teneritas eius crassitiei opposita sit. Nam, quia cum aetate, vniuersum corpus, adeoque et fibrae crescunt, ideoque crassiores etiam redduntur, earumque imminuitur teneritas: si haereditaria dispositio, in fibrarum teneritate consisteret, tanto minus posset haereditaria dispositio in apertum morbum erumpere, quanto prouectioris aetatis homo est; quandoquidem, imminuta, propter ingrauescentem aetatem, fibrarum teneritate, morbi causae vis atque efficacia infringeretur.

§. XXXXVI.

Neque haec sententia, cum veritate consistet: si teneritas fibrarum idem sit, quod exquisitus sensus. Experientia enim docet, exquisitissimo sensu, teneros infantes praeditos esse; quippe qui, et pulsu frequentiori gaudent, et a vermibus vel difficiliori dentitione vexati, non raro convulsionibus corripiuntur,

tur, quae ab hisce causis, haud adeo facile, adultis contingunt. Sed quum sensus isti paulatim cum aetate minuantur; ut in decrepita aetate obscurissime sentiant homines: deberet quoque, temporis longitudine, haereditaria dispositio imminui, ac tandem penitus deleri, idque in omnibus, sine vlla exceptione; quia eadem ubique est decrescens haereditariae dispositionis causa. Quod an observationibus virorumque doctorum adsertis respondeas, iudicent, qui omni vacant praecudio.

§. XXXXVII.

His de haereditaria dispositione praemissis, haud adeo difficile erit perspicere, quid sint morbi haereditarii. Notandum autem praeterea est, causas morborum remotiores duplicis esse generis, *mutantes* alias, alias *determinantes*. Ad has, refertur etiam, in scholis medicis, haereditaria dispositio. Ac proinde morbi, quorum causa remotior determinans est haereditaria dispositio, *haereditarios* adpellauerunt.

§. XXXXVIII.

Morbi, aut in utero iam infestare infantes incipiunt, aut non. Priores, *connatos* dicere liceat; posteriores autem *non connatos*. Horum autem causa determinans, vel tradita est infanti in utero adhuc concluso, vel nata est, postquam in lucem iam editus esset, Illi *haereditarii*, isti autem *adscititii* dicendi sunt.

§. XXXXVIII.

Quapropter *naevi materni* aliaque grauiora conformationis vitia, in quantum morbi sunt, ad morborum connatorum potius, quam haereditariorum classem referendi videntur; utique, si vna cum homine nascuntur. Naevi enim materni, qui multo tempore post erumpunt, illis fore locis, eoque tempore, quibus idem contigit parentibus, quod a se animaduersum scribit PELARGVS r), suo iure, dici possunt morbi haereditarii, iique cutanei.

§. L.

r) STORCH alias Pelargus l. c. p. 41. n. 4.

§. L.

Iam a vetustissimis medicis, haereditaria dispositio adnumerata est, morborum causis remotioribus. Nec sine ratione. Nisi enim aliae causae, cum procatacticae, tum etiam occasionales accesserint: haereditaria dispositio, propria sua vi, morbum non inferet. Accedentes istae causae tales esse debent, quae dispositionem haereditariam adaugent, fluidas primo, dein solidas etiam partes corrumpendo; cum qua combinatae, immediatam morbi causam efficiant. Nam, si, qui ad paternos morbos, proclives sunt, eam inierint victus vitaeque rationem, quae innatae illi gentilitiae dispositioni contraria est: morbus hic in herba quasi extinguetur, nec unquam oriturus est, quem alias, propter dispositionem haereditariam, metuere debebant.

§. LI.

Concurrunt autem, ad morbi haereditaria dispositione oriundi productionem, cum omnes causae naturales et non naturales; tum praesertim aetas, vitae victusque genus et regionum incolatus. Scimus namque, certas aetates, quibusdam morbis maxime oportunas esse. Si ergo homo, et per aetatem, et vitae genus, regionisque, quam incolit, et aëris statum, ad eundem morbum propendet: fieri secus nequit, quam, ut inde, citissime existat morbus. Nam, quia res hae morborum causis accensentur: cum dispositione gentilitiae, eadem si fuerint coniunctae, adeoque immediatam morbi causam effecerint, morbum sequi oportebit.

SCHOL. Suspicio fore nonnullos, qui dicant, morborum, quos nos haereditarios dicimus, v. gr. podagrae, phthiseos, hydropis causam, rebus, quas recensuimus, potius, quam haereditariae dispositioni attribuendam esse. Verum tamen novisse oportet, *primo*, non omnes illas causas ad morbi haereditarii productionem, necessario requiri, sed interdum sufficere unam, cum dispositione haereditaria coniunctam. Quamquam, si plures adhuc accesserint,

XXIV DE MORBIS HAEREDITARIIS

rint, morbus, et celerius oriturus, et saevior futurus esse videatur. *Deinde*, si aetas, vitae genus, regionum et aeris conditio, tales morbos, sine ullis aliis causis concurrentibus, inducerent: omnes illos, qui eandem degunt aetatem, idem vitae genus sequuntur, eandemque incolunt regionem, morbis iisdem laborare oporteret. Quod quum non fiat, nisi in morbis endemice et epidemice grassantibus: alia quaecumque causa accedere debet, per quam illae, ad morbum inducendum idoneae redduntur, quae alia, hoc in casu, esse nequit, quam haereditaria dispositio.

§. LII.

Haereditarii morbi alii acuti sunt, alii chronici. Illorum numero habetur potissimum apoplexia, quo etiam retulit *Illustr. D. DELIVS* catalepsin (§. 30.): dubium tamen non est, quin plures quoque morbi ex acutorum genere, huc pertineant, maximeque inflammatorii, quibus illos praesertim frequentissime laborare videmus, quorum parentes in huius generis adfectus proclives erant. Quum etenim parentes, solidarum quoque constitutionem morbosam partium, seu illa in conformatione mala, seu tono minus naturali consistat, liberis ingenerent (§. 13.) solidarum vero partium vitia, ac in primis rigiditas, sanguinem condensando et coagulando, s) liquida ad stagnandum cogant t), atque adeo inflammationibus occasionem praebeant: euidenter liquet, morbos quoque inflammatorios, qui acuti sunt, haereditarios esse posse.

§. LIII.

Videtur equidem acutos morbos, in haereditariorum classem, minime referendos esse; propterea quod, acuto morbo conflictati, vix sint ad propagandam sobolem apti aut excitati: si tamen penitus rem inspiciamus, manifesto patebit, acutas quoque acgritudines, per generationem, propagari in liberos posse.

s) Ill. van SWIETEN Comment. in aphorism. BOERH. §. 52, n. 2.

t) ibid, §. 372.

posse. Sciendum namque est, parentes, non eo tantum tempore, quo morbo vexantur, sed etiam cum eo liberi ac immunes sunt, dispositionem ad morbum quandam habere, eandemque, sub hoc quoque valetudinis statu, liberis suis, ingenerare posse v). Quod si ergo, eo tempore, parentes, liberos genuerint, quo in acutum quendam morbum erant proclives: eadem haec morbosa corporis conditio, in liberos propagari poterit.

§. LIIII.

Solent praeterea morbi haereditarii ante iustum et congruum tempus, plerumque infestare homines (§. 43.); quin et illis molesti interdum esse, quibus alioqui, per temperamentum corporis, aetatem sexumque, minime conuenire videntur. Sic podagra est morbus talis, qui proprie competit masculino sexui, aetate senili, aut illi virilis aetatis termino, qui senectuti est proximus, temperamento denique cholericis: sed interdum feminas etiam, eunuchos diuexat x), ipsamque adurit iuuentutem: y) si a haereditaria dispositione, natales suos duxerit. Quum igitur illos *morbos*, qui, aut sexui, aut aetati, aut temperamenti, non competunt, *incongruos* adpellent medici: morbi haereditarii, parte maxima, incongrui erunt; quamquam, statuere videatur HIPPOCRATES, in podagram, incidere mulieres posse, a menstruorum defectione, aliisque causis procatacticis.

§. LV.

Ipsa ego familiam noui, in qua quinque fratres germani numerantur, qui omnes, iam ante quadragesimum aetatis annum calui euaserunt. Filius fratris natu maximi, quamquam, cum adolescens adhuc esset, denso capillo et eleganti caesarie fuerit ornatus: vix tamen ad annum sextum atque vigesimum accedens, decrepiti instar senis caluescebat; non quidem, quod scio, pro-

D

pter

v) BOERHAVE aphorism. §. 1255.

x) D. FICKII Comment. in aphorism. Hippocratis Sect. VI. aphor. 28. 29. 30.

y) Ill. STAHL diss. de haered. dispositione ad varios adfectos §. 45. 46.

pter ingentes quosdam diaetae errores, sed potius, prout mihi quidem videtur, propter haereditariam dispositionem, a patre acceptam, et in vniuersa illa familia propagatam.

§. LVI.

Quanto autem grauior futurus est morbus a dispositione pendens haereditaria: tanto euidentioribus signis, iam antecedentibus aetatibus, semet manifestat. Quod acutissimus STAH-
LIVS luculentis obseruationibus illustrauit z); ideoque adseuerare non dubitauit, *grauiores haereditarios morbos, in liberis, alios adfectus prioribus adfines, praecedere consuesse.* a) Vt adeo vel ex hoc capite, satis pateat, minus recte sentire eos, qui dubitant, haereditariam dispositionem, multis annis, occultam, ac quasi sepultam latere posse (§. 27.); neque illos, rem, acutetigisse, qui negant, haereditariae causam dispositionis, humoribus, vel solidis partibus, nisi, in quantum sunt iusto tene-
riores, inesse posse (§. 42. et seqq.)

§. LVII.

Sed ad ipsam iam morborum gentilitiorum diagnosin accedamus. Quae quamquam difficilis admodum habeatur; quum dispositio haereditaria, haud adeo euidentibus indiciis, semet manifestet, maximeque, vbi nondum actiuosa reddita est: attenta tamen mente, singula, quae, partim de dispositione haereditaria, partim de morbis haereditariis, commentati sumus, expendentibus, sponte quasi semet offerent diagnostica horum adfectuum indicia. In quibus quidem colligendis, tanto prudentiorem medicum esse oportet, quanto facilius, propter magnam similitudinem, cum aliis morbis, tum connatis, quam adscititiis, confunduntur.

§. LVIII.

Magni namque interest, certo cognouisse, an morbus sit haereditarius, vel alterius generis. Si enim, vt variae sunt morborum

z) Differt de morborum aetatum fundamentis. coll. differt. laudata de dispos. haeredit. ad varios adfectus.

a) l. c. §. 44 seqq.

borum caussae, ut denique, morbi, natura et indole, a se invicem discrepant: ita quoque variam esse curationis rationem incundam, universi medicinae auctores, iure quodam, contendunt: quidni, et morbi ab haereditaria profecti dispositione, aliam requirunt curationis rationem, quam adscititii; quippe quorum caussae sunt diuersae. Si autem medicum, morbi natura caussaque lateat: equidem non video, qui possit, legitima certaue methodo, ad eundem aut mitigandum, aut extirpandum, vti. Quemadmodum itaque morborum omnium curationis, certam atque exactam morbi cognitionem, quoad eius causas, naturam, euentum, requirit: sic etiam necessarium est, haereditariam recte nosse dispositionem; quo ita morbi gentilitii curatio, medendi legibus conueniens institui, eiusdemque futuri euentus, certo, aut coniectura quam maxime probabili, praesciri possint.

§. LVIII.

Primo itaque, qui scire cupit, an hic vel alius morbus sit haereditarius; inquirat, necesse est, in *parentum constitutionem* illius, qui morbo illo conflictatur; parentum siquidem natura cognita, ad deprehendendam liberorum indolem, plurimum confert, FERNELIO, idipsum, caute et prudenter monente b). Simul etiam sciscitari oportet, an parentes, eo ipso tempore, liberos genuerint, quo, diuexati morbo sunt. Haec si ita se habeant omnia: fieri potest, liberos, a parentibus suis, haereditariam ad similes adfectus dispositionem accepisse.

§. LX.

Aliunde iam constat, diuersum corporis habitum, variis quoque morbis obnoxios reddere homines: quippe qui, pro causa morborum determinante, semper habitus est. Sic, habitu corporis gracili et macilento, collo oblongo, complanato angustoque pectore praeditos, sanguinis sputum phthisinque metuere debere, vetustissimi auctores iudicarunt. Quod etiam

b) Patholog. Lib. II, cap. 12.

XXVIII DE MORBIS HAEREDITARIIS

usu atque experientia multiplici, comprobatum est. Quodsi itaque, eodem corporis habitu, liberi gaudent, quo parentes: suspicio non levis est, eos in eosdem plane morbos proclives esse, quibus parentes laborarunt; atque adeo dispositionem habere haereditariam.

§. LXI.

Plurimum quoque confert ad certam haereditariae dispositionis cognitionem, temperamentorum consideratio. Quia enim corporis temperamentum, morborum causa est determinans remotior: eodem si temperamento sint liberi, quo parentes erant, cum eosdem genuissent; in eosdem quoque morbos propensi sint liberi, necesse est, quibus olim illorum parentes exagitabantur. Quae in parentum morbos liberorum propensio, quoniam haereditaria adpellatur dispositio (§. 25.): intelligit quisque, ex temperamentorum similitudine, si non certa atque euidencia, saltem valde probabilia, haereditariae dispositionis indicia petenda esse; inprimis autem, quum corporis etiam temperamenta, per generationem, in liberos propagentur (§. 11.)

§. LXII.

Quamquam autem a temperamentorum similitudine, quae parentes liberosque inter observatur, ad haereditariam liberorum dispositionem; admodum probabiliter concludere liceat: (§. 61.) tamen, si dissimilia sint parentum et liberorum temperamenta, ut non raro contingit; negandum propterea non est, liberos, haereditariam dispositionem, a parentibus habere. Quia enim haereditarii morbi incongrui esse solent (§. 54.) dispositio haereditaria inesse potest liberis, paulo post, per morbum, semet ostensura; tametsi hi, alio corporis temperamento, quam parentes, praediti videantur.

§. LXIII.

In antecedentibus commemoratum iam est, certis aetatibus, certa quoque attribui posse temperamenta (§. 6.) Ac proinde, quum parentes liberique, viroque adhuc supersite, eadem

eadem aetate esse non possint: diuersis quoque temperamentis gaudere debent; aetas siquidem ipsa, temperamenta immutat. (§. cit.) Verum tamen in eo possunt conuenire parentum atque liberorum temperamenta: quod, quam proxime, ad se inuicem, similitudine quadam, accedant. Videturque eam esse solere temperamentorum rationem, parentes inter atque liberos: vt illi, cum ea aetate essent, qua eorum liberi sunt, eodem quoque temperamento gauisi sint, quo nunc liberi; itemque, si hi parentum aetatem attigerint, idem quoque consequantur corporis temperamentum, quo parentes eorum, simili aetate, erant praediti. Quae eo certius futura conicere licet: si idem vitae genus sectentur liberi, quod parentes; sique simili vtantur victus ratione, eandemque incolant regionem aut ciuitatem.

§. LXIIII.

Deinde aetatis etiam consideratio haereditariae dispositionis diagnosin, multum illustrabit, reddetque certiore: vt etiam praesagire liceat, sed coniectura duntaxat probabili, quo tempore, haereditaria dispositio, actiuosa futura sit, verosque morbos productura. Quod si itaque, liberi, eam attigerint aetatem, qua olim parentes, morbo quodam, ad quem illi nunc procliues sunt, diuexabantur: scire licet, eo tempore, non modo gentilitiam adesse dispositionem; verum etiam morbos inde oriundos iam imminere. Tantoque plus certitudinis iudicium hoc habebit: si etiam corporis habitus atque temperamentum, aliaeque *occasionales causae* simul conspirauerint.

§. LXV.

Quum, singulis aetatibus, singularia certaue temperamenta dominantur (§. 6.); certumque sit, morborum nonnullos, certas potissimum aetates infestare solere, illisque proprios quasi esse, quos ideo *aetatum morbos* vocauerunt, ipso HIPPOCRATE praeunte c), quem laudabili et egregio conatu sequutus est

D 3

STAHLIVS

c) *Aphorism. Sect. III. aphorism. 24. ad 31.*

XXX DE MORBIS HAEREDITARIIS

STÄHLIVS d): dubium superest nullum, quin haereditaria dispositio, definita aetate, efficacior reddatur ad prognerandos morbos; seque adeo, manifestioribus signis, quam alias, cognoscendam praebet.

§. LXVI.

Quamquam autem morbos, a dispositione haereditaria, profectos, plerumque incongruos esse consueſſe, obseruationibus fide dignissimis, luculenter constet (§. 54.): non tamen prius in apertas flammās, latentes illae haereditarii morbi scintillae erumpunt; quam, si proxime accesserit hominis aetas, illi aetati, cui morbus hic proprie competit.

§. LXVII.

Obseruare praeterea iuuabit, num adfines morbi, in teneriori aetate, adparuerint, qui sint quidam quasi venturi morbi haereditarii nuncii. Hoc si animaduersum fuerit: habebimus nouum, idque haud leue, haereditariae dispositionis indicium. Qua de causa, adposite iudicasse videtur STÄHLIVS e) dicens: *omnes aetatum morbos veros, haereditarios simul esse.* Multo autem vero similior cognitio erit: si etiam certum atque exploratum sit, eosdem adfectus parentes perpeſſos esse, cum eandem vixissent aetatem. Quam in rem sedulo inquirere, boni medici est.

§. LXVIII.

Videndum tandem est, si quis haereditariam dispositionem certo cognoscere velit, an liberi, eidem vitae generi, cui parentes, dediti sint. Si enim, cum parentibus, simile vitae genus sequuntur liberi, simulque exploratum est, liberos, certo quodam morbo conflictatis parentibus, prognatos esse: colligere ex eo licet, liberos, in parentum morbos, per haereditariam dispositionem, procliues esse.

§. LXIX.

d) de morborum aetatum fundamentis.

e) laudata differt. de dispos. haereditaria ad varios adfectus §. 42.

§. LXVIII.

Quantum vitae genus, siue ad concipiendos fouendosque, siue ad profligandos morbos quoscunque, possit et valeat: nulla, vt opinor, demonstratione, eget. Constat etiam inter omnes, parem esse, cum vitae genere, temperamentorum rationem; vt illo commutato, temperamenta quoque, a priori sua indole degenerent (§. 6.). Ex quo quidem, hoc planissime consequitur, eodem seruato vitae genere, eadem etiam perseverare corporis temperamenta: vtique, si caetera etiam sint paria. Necesse itaque est, eandem etiam immanere corporibus dispositionem, quam, per generationem, a parentibus, acceperant liberi: si hi, simili vitae generi, cum parentibus, dediti sint. Contra autem ea, hinc elucescit, si liberi aliud vitae genus elegerint, quam parentes: fieri posse, vt innata illa haereditaria dispositio, sensim deleatur et euanescat; aut certe ita enervetur, ne vnquam in apri- cum prodire, morbumque producere possit. Quare, vitae quoque generis similitudo, haereditariae dispositionis signum, sit, oportet.

§. LXX.

Postremo, iuuat etiam nosse, an parentum morbus, certum duntaxat sexum vexare soleat, vel vtrique sexui esse communis. Si enim prius esse constet: liberi alterius sexus, quam erat parens morbidus, parentis morbo obnoxii non erunt. Sic, si mater, gestationis tempore, fluore albo, infestabatur: filius quem tum vtero gerebat, nequit eidem morbo obnoxius esse, quippe qui feminino sexui vnice competit; quamquam contingere possit, vt is, in alios morbos gentilitiam propensionem nanci- scatur, qui masculis quoque sunt familiares, quique cum fluore albo sunt adfines, e. g. In cachexiam, scabiem cet.

§. LXXI.

Itaque si parens morbidus, liberique ab eo geniti diuersi sint sexus; et parens morbo laborauit, qui alteri sexui est incon- gruus, aut plane inconueniens: tum etsi liberi non habeant dis- positionem

XXXII DE MORBIS HAEREDITARIIS

positionem ad parentis morbum; tamen ad alios morbos, qui parentis morbo adfines sunt, proclives possunt esse. Pater podagricus, filiam genuit, corporis habitu externo temperamentoque sibi simillimam. Quae, licet podagra immunis viueret: multum tamen arthritide diuexabatur. Cuius filia, vix vicissimum aetatis annum ingressa, articulorum dolore discruciabatur. Vnde liquet, si non eundem plane specie morbum, parentes, liberis suis ingenerant: eosdem tamen, adfinium morborum semina, liberis, relinquere posse.

§. LXXII.

Ex quibus adparet luculenter, quam cautum esse medicum, in iudicando, oporteat: si nosse velit, an hic, vel alter aegrotantium, haereditariam in quosdam morbos propensionem habeat. Vni enim alterius signo, fidendum non est: quia secus, praecudiciis occupari, veritatem non perspicient. Tanto vero propius ad certitudinem, et indubiam veritatem, iudicando accedemus: quanto plura signa, paulo ante quae recensuimus, vni eidemque aegro conuenire deprehendimus.

§. LXXIII.

Inutile profecto non est haereditariam dispositionem, certis cognouisse indiciis. Tutius esse existimo, imminentem morbum auertere, oriri ne possit; quam, tum demum de eo extirpando sollicitum esse, cum iam praesens corpora adfligit. Quod si haereditariam dispositionem, mature, et, antequam confirmata in neruum erumpere posset, medicus cognouerit: impedire potest, quo minus morbus inde nascatur, quem metuit; partim medicamentis, partim adcurata diaeta, gentilitiam oppugnando dispositionem; in primis, si, et aeger, et amici eius, suo satisfecerint officio. Quantum hic valeat prudens ac sollicita liberorum educatio, ad auertendos morbos, facile quisque iudicabit: quin etiam patet, quantum incommodi, ex praua educatione, in liberorum cum animum, tum etiam corpus, redundet. f)

§. LXXIII.

f) Cl. KRÜGER Gedanken von Erziehung der Kinder.

§. LXXIII.

Iam itaque facile quisque intelligit; cur non omnes, qui, valetudinariis nati parentibus sunt, laborent morbis, quorum semen atque causam, per generationem, a parentibus, communicatam, intus fouent, quare ideo, haereditariis morbis, propter quandam in eosdem propensionem, obnoxii sunt; ut adeo dispositio haereditaria, gentilitios morbos, ineuitabili quadam necessitate, non producat. Scilicet, si victus omnesque diaetae rationes ita instituant; ut singula, quae eandem, cum dispositione haereditaria, morbos producendi vim atque potestatem habent, quare adeo, haereditariis morbis, suppeditant occasionem, fugiant: haereditaria dispositio, ad generandos morbos, iners et impotens manebit. Quod si obseruent homines: nunquam causa existet immediata (§. 50.); ideoque neque morbus suboriturus est; tametsi ad eundem concipiendum quaedam insit corpori aptitudo atque propensio.

§. LXXV.

Inde etiam, perspicimus, qui fiat, ut, latente in liberis haereditaria dispositione, nullum interdum isti incommodum sentiant: quae tamen, in *nepotes*, per generationem, translata, hos demum adfligat; tamque diu occultatae morbi scintillae in apertas flammās erumpant. Quod a quibusdam obseruatum dicitur, et BOERHAVIUS aperte statuit g). Si namque liberi, quibus innata quaedam ad concipiendos parentum morbos, propensio est, optimam sequantur victus et diaetae rationem; neque vtilia remedia chirurgica, pharmaceutica, oportuno tempore et conuenienti methodo, in auxilium vocare intermittunt: immediata morbi causa existere nequit. Gentilitia itaque dispositio, nullis accedentibus, quibus irritari, et ad inferendum morbum, prouocari possit, quiescit; neque omnino filiorum valetudinem perturbat. *Nepotes*, quibus, licet eorum parentes mediocri valetudine vterentur, nihilo minus innata im-

E

pressaue

g) *Aphorism. de cognosc. et curandis morbis.*

XXXIV DE MORBIS HAEREDITARIIS

pressaque haereditaria dispositio est, crebris in victu erroribus, prauaque diaeta, si prauam humorum temperiem sibi accersuerint, quae cum haereditaria dispositione, immediatam morbi causam constituat: inhaerens illa, tacitaeque in filiis, gentilitia dispositio, facile auitos morbos progenerabit.

§. LXXVI.

Imo intelligere quoque possumus, cur interdum citius, interdum vero serius, morbi haereditarii propullulent. Quod quidem fit, propter peculiare vitae genus variumque victum. Quo enim grauiiores aduersus leges diaetae errores committunt ii, qui haereditaria labe infecti sunt, quoque citius ad hoc vitae victusque genus se transferunt: eo quoque celerius haereditaria dispositio erumpens, morbum inducet gentilitium; cumque pro peioris vitae generis ratione, peiorem et curatu difficiliorrem. Huc spectare videtur HORATII illud:

Aetas parentum, peior auis, tulit

Nos nequiores, mox daturos

Progeniem vitiosorem.

§. LXXVII.

His si quis signis (§. 59. seqq.) certam haereditariae dispositionis diagnosin sibi comparauerit: ei haud adeo difficile erit cognoscere, an iste vel alius morbus sit haereditarius, aut minus. Cum morbo namque praesenti, eiusque natura et adparentibus symptomatibus, ac denique, cum dispositione aegri haereditaria, suis primo signis, detegenda, si comparatio instituatur: prudens medicus, ex cognita causa, ad praesentem effectum facile argumentabitur; perspectaque, inter hasce res, aut similitudine, aut dissimilitudine, an morbus praesens sit haereditarius, vel secus, haud aegre intelliget.

§. LXXVIII.

Enim vero, morbus, quo filius laborat, aut est idem cum illo morbo, quo laborabat parens, aut omnino diuersus. Hoc si verum est: filii morbus aut habet adfinitatem quandam, cum
parentis

parentis morbo, aut nullam. Si filii morbus eius est speciei, cum parentis morbo; aut si filii et parentis morbi sunt adfines; ac denique, si, evidentibus signis, constat, filium, haereditariam dispositionem a parentibus acceptam habere: dici iure potest, haereditarium filii morbum esse.

§. LXXVIII.

Caeterum, nouisse oportet, omnes haereditarios morbos, difficillimae curationis esse. Sunt enim aut acuti, aut chronici (§. 52.). Acuti, aut cito perimunt aegrotantes: aut, nisi vitae vis artisque auxilia potentiora sint morbo, in alios degenerant morbos, cosque chronicos v. gr. apoplexia, in paralyfin, inflammationem, in scirrhum, in pus. Neque praetereundum est, acutos morbos haereditarios, etiamsi felici euentu terminati sunt, plerumque reuerti, propter remanentem ad eandem dispositionem, qui postremo perniciales sunt futuri.

§. LXXX.

Nouimus etiam, chronicos adfectus aegerrime cedere remediis, etiam potentissimis. Tanto ergo plus laboris operaeque haereditariorum morborum sanatio requirit, quorum pars maxima ad chronicos pertinet: quanto magis haereditariorum morborum causae atque adscititiorum, a se inuicem dissident. Testatur id frequens medicorum observatio, qui, quanto quamue difficili labore, eiusmodi aegritudines, non dicam tollantur, sed mitigentur tantum, experti sunt.

§. LXXXI.

Nunquam etenim haereditarius morbus radicitus extirpabitur; nisi prius sublata fuerit haereditaria dispositio (§. 45.). Quod quidem propemodum fieri non posse videtur: siue solidis, siue fluidis partibus, haereditaria dispositio innata sit. Qua re etiam factum est, ut plerique viri docti, haereditarios morbos, perfecte sanari posse negent, aut certe dubitent: maxime, postquam in vetustatem iam incidissent, temporisque longitudine, essent confirmati.

§. LXXXII.

Ea enim si solidis inest partibus, siue, quoad conformationem vitiata, siue, malum fibrarum tonum, maxima vi, corporibus adhaerescit. Mala conformatio emendari nequit, in primis, si mali principio, conuenientia remedia adhibita non sunt; temporisque adeo vetustate, solidae partes male conformatae, ita roboratae sunt, vt nulla fere vi aut arte, flecti possint. Quod eo difficilior, si vnquam succedit: si partes male conformatae interioribus in ventribus delitescunt. Quanto labore taedioque aegrotantium, *tonus* fibrarum immutetur atque emendetur, maximeque is, quem *physicum* adpellant; difficilis molestaque cachexiae, hydropis, aliorumque morborum, quorum causa est deprauatus fibrarum tonus, curatio, manifesto est documento. Quod si igitur adscititius malus fibrarum tonus, aegerrime corrigitur: quanto difficilior, remedii cessurus est haereditarius morbus, cuius causa, tenerrimo embryoni, in vtero adhuc impressa est; quiue adeo, crescente in dies malo, quodam modo, alteram hominis naturam constituit?

Naturam expellas furca, tamen usque recurret.

§. LXXXIII.

Si autem eadem, in ipsis haeret fluidis: par eius est ratio. Quanto subtiliores sunt morborum causae: tanto, non modo difficilior tolluntur; verum etiam, corporibus, sine conspicua valetudinis laesione, diutius immorantur. Quod in rabie canina, peste, venerea lue, aliisque morbis non paucis experimur. Omnes, hydrophobiae, pestiferae venereaeque luis et variolarum subtilitatem admiramur: multique viri docti, in cognoscenda horum morborum materia eiusque natura ac indole, operam suam, magis fortasse laudabilem, quam proficuum, collocarunt. Id saltem, ex effectibus eius, legitimo ratiocinio, innotuit, materiam illam subtilissimam esse oportere.

§. LXXXIII.

Idem fere vt de natura haereditariae dispositionis, quae humoribus inest, credam: eius propagandi ratio, quae, per genera-

generationem fit, magnopere suadet. Quum etenim haereditaria dispositio, per masculinum semen, in liberos diuulgetur; (§. 35.) nec prius, gentilitia dispositio vim suam exserat, quam, multis demum elapsis annis, vt plerumque fit, aliisque causis concurrentibus: necesse est, vitiosam fluidorum qualitatem, in qua, haereditaria dispositio consistit, quaeue ex masculino semine, in foetum redundat, valde subtilem, ideoque aegerrime mutabilem esse. Quae materia nisi talis, qualem iam diximus, esset: aut cito morbum induceret, aut illis mutationibus, quae cuiuslibet aetatis ingressu, in corporibus, contingunt, vis atque indoles eius perderetur.

§. LXXXV.

Qualiscunque autem vitiosa illa humorum qualitas fit (§. 84.), siue acrimonia, siue spissitudo, siue quaedam acris et spissi complicatio: aegerrime tolletur inde profecta dispositio gentilitia. Acrimonia, spissitudo sanguinis, qualis in primis in chronicis passionibus esse solet, difficulter alteratur; quia facile, nisi cautus sit medicus, ultra, quam par est, vitiosam sanguinis qualitatem alterando, ad oppositum extremum perueniet. Idque tanto contingit facilius, magisque est metuendum, vbi duo ista vitia, acre et spissum, simul coniuncta sunt: quum, vno oppugnato destructoque, alterum augeri semper fere oporteat; vt, resoluta, per salina, viscedine, augeatur humorum acrimonia.

§. LXXXVI.

Morbi adscititii chronici, quodsi in principio, aut negliguntur penitus, aut imperite prauaque methodo tractantur; sicque inueterati, altius iam radices egerunt: tandem in consuetudinem abeunt, quos ideo *habituales* dixere. Hos perfecte sanare, cumque radice extirpare, aeque difficilis negotii res est. Quod si iure meritoque de morbis adscititiis statuitur: quis, quaeso, est, qui dubitet, idem quoque de haereditaria dispositione, morbisque inde oriundis, dicendum esse; postquam,

longo tempore, corporibus inhaerens, et in dies velut quoddam fermentum, multiplicata latiusque serpens gentilitia dispositio, consuetudinem habitumque hominibus induxerit.

§. LXXXVII.

Observationibus fide dignis constat, debellatos quidem morbos haereditarios interdum esse: h) si tamen aegri ad priorem victus rationem, qua, haereditaria dispositio, quasi irritatur, quacum adeo illi occasionem praebet, priorem repetendi fabulam, reuersi sint, sopitos iam dum morbos, iterum reuixisse. Quod certe vix fieri posse videtur: nisi, morbo tantisper percurato, haereditaria dispositio, utpote illius causa, constans corpori inhaesisset. Ac proinde, quum satis pateat, dispositionem haereditariam, si in vetustatem abiit, tolli vix posse: sponte sequitur, morbos quoque haereditarios perfecte sanari vix posse. Cuius sanandi difficultatis causa, an sit in arte, vel artifice, vel in aegris salutaribus praeceptis minus obsequentibus, intelligere non est difficile. Certe, aegrorum morositas, impatientia, molities, plurimum obstare solet morborum sanationi: ut medicus, omnia ex lege optimaque medendi methodo, selectissimisque remediis, instituens, nihil tamen quidquam proficere possit.

§. LXXXVIII.

SCHENKIVS quidem, viri triginta annos nati, et arthritide vexati, ut ille ipse memoriae prodidit, haereditaria, historiam recensens, eum, *ex integro, morbo isto liberatum esse*, opinatus est: eo quod, instituta trimestri curatione prophylactica, aeger, viginti annos, arthritide immunis vixerit. i) Ego autem, pace tanti viri, vehementer dubito, ex salutari optatoque trimestris curationis prophylacticae euentu, certo colligi posse, morbum, *perfecte*, seu, ut auctor inquit, *ex toto*, id est, cum sua causa, dispositione haereditaria, sublatum esse. Enim vero

satis

h) Ill. van SWIETEN *Comment. in Aphorism. Boerhav.* T. III. §. 1080. p. m. 436.

i) *Observat. medicarum rarar.* Lib. V. Obs. 156, p. m. 379.

satis clare, historiae illius auctor, causas antecedentes exponit, cum praedisponentes, tum etiam procatacticas, ut sunt, vitae genus luxuriosum, quieti otioque deditum, animus ad iram propensissimus. In subsequenteribus autem, nihil eorum commemorat, an, trimestri absoluta medicatione, aeger a prioris vitae generis prauitate destiterit, vel minus. Arbitror tamen, et medicum, aegrum suum, ad temperantiam diaetamque meliorem cohortatum esse; et aegrum, salutaribus medici consiliis locum dedisse. Hoc si ita, ut opinor, factum est: mirum non est, aegrum illum, viginti annis, liberum et immunem arthritide vixisse; quanquam dispositio haereditaria sublata non sit (§. 27. 43. seq. et 50. seq.); adeoque, nec arthritidem illam ex toto ac perfecte sanatam esse.

§. LXXXVIII.

Plura alia exempla prostant, quae docent, haereditarios morbos, exquisito victu, et debita vitae ad verae diaetae regulas compositione, deinde utilium quoque remediorum legitimo usu, superatos esse; ab iisque, immunes liberosque, tamdiu mansisse aegros, quoad salutaribus medicorum consiliis obsequerentur. In quo proposito, si constantes perstiterunt: nunquam quidem reuertebatur morbus; quum haereditaria dispositio, nullam haberet valetudinem turbandi occasionem: proximam tamen potentiam, ad reuocandos priores morbos, quae in haereditaria dispositione consistit, remansisse, illorum exemplis, confirmatur, qui, sprete saluberrimis consiliis, priori vitae generi immoderato, semet tradiderunt. Quod certe, non in morbis tantum gentilitiis, verum adscitiis etiam, maximeque chronicis et habitualibus, medicinam facientes experiuntur.

§. LXXXX.

Quae haecenus (§. 79. seqq.) diximus: ea docent, quid in morbis haereditariis praesagire debeamus. Iam itaque ad curationem digrediamur. In cuius tractatione, haud adeo prolixi erimus: partim, quod methodum his morbis medendi vniuersalem

XL DE MORBIS HAEREDITARIIS

uersalem duntaxat, proponendi animus sit; partim etiam, quod, magna cum laude, hoc in argumento, ante nos, alii versati sint.

§. LXXXXI.

Sciendum itaque est, morbi haereditarii, ne oriantur, impediri posse. In quo, *curatio prophylactica seu praeferuatoria* consistit. Sed, si exstirpantur ii, dicimus hanc *curationem curatorem*, quae duplex est: *perfecta et imperfecta, seu radicalis et palliativa*, quarum prior, *sanatio recte* dicitur. Consistit enim illa, in perfecta morbi causae exstirpatione: haec autem, in sola symptomatum maxime vrgentium mitigatione, in qua morbi causa vix attingitur.

§. LXXXXII.

Curatio prophylactica (§. 91.), in eo consistit, si impediamus, quo minus immediata morbi causa, adeoque morbus ipse, exsistere possit. Absolvitur itaque, *primum, legitimo rerum non-naturalium usu*, aëris, potus, cibi, quietis motusque et animi adfectuum; *deinde vero naturalis oeconomiae animalis status conseruatione*, in primis, quae ad secretiones et excretiones pertinet. Quem in finem, utiles erunt atque necessariae, euacuationes, oportuno tempore, et prudenter instituendae, purgatio, sudor, venae sectio. Nec minus iuuabit, viscera chylum praeparantia, medicina roborare: quo rite concoquant alimenta. Si enim ventriculus, intestina, hepar, suo munere, rite funguntur: nec cor, nec caetera viscera, suo officio facile deerunt; in primis, si caeterae etiam res, recte adhibeantur in usum. Prout autem varii sunt haereditarii morbi, eorumque dispositiones: ita etiam diæteticae regulae, gentilitiae dispositioni eiusque morbo adcommodatae esse debent. Quas quidem ex natura et temperamento hominis, gentilitiae dispositionis indole, iisque, quae, in paaentibus, aut noxia, aut vtilia fuisse obseruauimus, medicus, ratiocinando, elicere debet.

§. LXXXXIII.

Tutissima equidem esset curatio perfecta (§. 91.): sed, utinam certa aliqua, minimeque aegrotantibus molesta, methodus haberetur,

haberetur, quaeque adeo cita, tuta iucundaque esset! At vero, licet solertes medici excogitauerint methodum haereditariis morbis medendi, quae tuta sit, certoque salutem, aegrotantibus promittat: tamen, quoniam diuturna est, neque delicatis molibusque aegris grata ac iucunda esse potest; pauci sunt, qui leui temperantiae et sobrietatis impendio, sanitatem redimere velint.

§. LXXXIII.

Lactea cura, seu lactis meri dulcis vsus, per aliquot menses, imo etiam annos, continuatus, magnopere quidem laudatur, quod nec absolum videtur. Quodsi enim lacte, tenerimi infantes, optime nutriuntur: tanto facilius, ab adultis, liquor hic concoquetur. Quid? quod etiam virtus quaedam medicamentosa inesse lacti videatur. Pars enim eius caseosa, incrassat humores nimis tenues; serum autem diluit ac resoluit tenacia, facileque angustissimos meatus quosque permeat. Quot et quantos effectus, lac vaccinum dulce, toto anno, cibi potusque loco, exhibitum, in arthritide, podagra, praestiterit: observationibus non paucis, iam olim demonstravit DOLAEVSK) WALDSCHMIDIVS I), alique post eos, nostris temporibus, medici clarissimi. Quodsi ergo, lac, in his morbis, tam effectus, tamque vetustis, debellandis, magnam habet vim et efficaciam: idem, quin in quibusdam morbis haereditariis, etiam praestare valeat, insciendum non est; quamquam vix crediderim, a solo lactis vsu, perfectam cuiuslibet morbi haereditarii curationem (§. 91.), expectandam esse. Expertum id se retulit Ill. SCHMIDELIVS D. qui, toto biennio, solo lacte, podagricum, qui hoc malum a parentibus accepit, felici euentu, nutriendum iussit.

§. LXXXV.

Eundem autem effectum (§. 94.), an in omnibus morbis haereditariis, lac praestet, certo quidem nondum constat: mul-

F

tum

k) in tractatu, *de furia podagrae lacte victa et mitigata.*

l) disput. *de cura lactis podagricorum solatio, et certo podagrae remedio.*

tum tamen boni, ab eius usu legitimo, sperari posse, vel ab eius seri, vis eius acre temperandi, spissum dissoluendi, facilis concoctio, clare docent. In primis, si cruditates omnes, tempestive, blando purgante ex intestinorum canali, vacuentur; ne, impura nutriendo corpora, magis adhuc offendamus. Suadet etiam DOLAEVS, pro vario aegrotantium statu, animantia, quorum lac, aegris alimento et medicinae est, munda esse, herbisque medicatis, quae contraria virtute, morbi causam destruere iuvent, alenda. Forte enim lac eiusmodi animantis maioris erit virtutis. Tum tamen inutilis futurus est lactis usus: quando haereditaria dispositio, in physica fibrarum atonia consistit, aut homo, temperamenti phlegmatici est.

§. LXXXVI.

Subitaneas magnasque corporis mutationes, pertinacissimos interdum morbos, vt, *epilepsiam* m), *melancholiam* n), *maniam* o), *rabiem caninam* p), sustulisse, experientia docuit. Id quoque, in morbis haereditariis, si non omnibus, quibusdam tamen, contingere posse videtur: quamquam hoc remedium, pro tuto certoque, habendum non sit. Confirmatur id STALLII q) observatione. Nam, cum vir gentilitia podagra afflictus, incendii vicinitate territus, ingentia onera, praeter consuetudinem, portasset: duobus subsequentibus annis, podagricis paroxysmis, non tentabatur amplius, quos ante, quotannis expertus est. Postea quidem reuerfa est adhuc, fortasse ob admissum in victu vel alium errorem, sed mitior, quam antea esse solebat.

§. LXXXVII.

Neque prorsus insolitum est, quasdam aegritudines, ac praesertim chronicas, aliis morbis, tolli, qui maximas, inducunt

m) BOERHAVE *aphorism. de cognosc. et curandis morbis* §. 1080. et Ill. van SWIETEN *Comment. T. III. p. m. 416. seqq.* Cel LVNERERI *dissert. de commotionibus patheticis corpori interdum proficuis.*

n) Ill. van SWIETEN *T. III. §. 1115.*

o) Id. *ibid.* §. 1123.

p) Id. *ibid.* §. 1141. n. 3.

q) *dissert. de haereditaria dispos. ad varios adfectus* §. 45.

cunt corporibus, mutationes. Fieri namque, hac ratione, potest, ut, expulsa prioris morbi materie, vi alterius morbi adscititii, aut epidemici, ipse ille morbus cesset. Sic, epilepsiam, quartanae accessione, sanescere, HIPPOCRATES auctor est r). Narrat quoque MARCELLVS DONATVS s) historiam epileptici iuuenis, qui, a latronibus spoliatus, graui simul vulnere in capite accepto, epilepsia postea est liberatus. Icterus, febribus deleri, viceque versa, febres, ictero sanescere, GALENI, HIPPOCRATIS, aliorumque obseruationibus, perite solideque, ut opinor, PROSPER ALPINVS t) demonstrauit.

SCHOL. Ambigua equidem sunt remedia illa, quae magnas inducendo mutationes, diuturnos grauesque adfectus sustulisse dicuntur, (§. 96. 97.) ad perfectam morborum haereditariorum curationem. Verum tamen, ex fortuitis istis casibus, generalem quandam medendi legem et methodum, in curandis haereditariis morbis, fortasse non inutilem, eruere possumus.

§. LXXXXVIII.

Existimo autem, in eo, omnem artem, radicitus haereditarios morbos exstirpandi, sitam esse; ut, partim victu, aëris regionisque statu, partim vitae genere singulari et diaeta, a teneris vnguiculis, sensim inducatur status ille, qui est haereditariae dispositioni contrarius; atque adeo, ipsum corporis temperamentum, quoad eius fieri potest, in statum contrarium, mutetur. Quod quidem melius successurum confido, in tenera adhuc aetate, vbi haereditaria illa labe nondum inualuit, quam adulta. Recte igitur fecerint parentes; si gentilitia labe infectos se genuisse infantes arbitrantur; si liberos suos ita educauerint, ut haereditaria dispositio, in dies minuatur. Quod si rite factum fuerit: confido vehementer, ipsam etiam gentilitiam dispositio-

F 2

nem,

r) *Epidem* lib. VI.

s) Lib. II. cap. 4.

t) *de praesagienda vita et morte aegrotantium* Lib. V. cap. 5. conf.

FRID. HOFMANNI *fundamenta pathologiae generalis* p. m. 73. 101.

XLIV DE MORBIS HAEREDITARIIS

nem, prorsus eliminari posse. Verissimum namque, in hoc quoque casu, OVIDII illud est:

*Principiis obsta, sero medicina paratur:
Cum mala, per longas, inualuere, moras.*

§. LXXXVIII.

Consuetudo, ipsa natura vulgo dicitur. Nec immerito. Quaecunque enim, repugnante habitu atque consuetudine, tumultuarie et cumulativè suscipiuntur: iis, offendi valetudinem, in vulgus notum est. Quodsi ergo, pravam consuetudinem deponere velis: eam mutationem, caue, subito suscipias. Periculosa enim est. Ea, quae aduersus consuetudinem sunt, primo sint minima, quae sensim augeantur in dies: donec homo, sine molestia, taedioque, contrariam rem ferre adsuescat v). Hac ratione, pessimam quamque consuetudinem, sine ullo incommodo, exuere licet; imo ipsa quoque corporis, quin et animi temperamenta, haud mediocriter commutare x).

§. C.

Quod, si de longa atque inueterata consuetudine (§. 99.) valet: incredibile non est, idem quoque, in delenda, vel potius emendanda morbosa haereditaria dispositione, contingere posse. Sensim itaque tardeque, contrariis remediis, maximeque diaeteticis, haereditaria morbosa dispositio corrigi potest, adeoque morbi etiam haereditarii sanari, iis etiam, quae, in curatione prophylactica commemorauimus (§. 93.), diligenter obseruatis.

§. CI.

Quid in imperfecta gentilitiorum morborum curatione (§. 92.) obseruandum sit: sigillatim exponere, institutio non requirit. Prout enim varium est haereditarii morbi ingenium, diuersaque vrgentium symptomatum indoles: ita quoque variare debet medicus indicata atque indicationes. Veritati tamen, et optimae


v) BOERHAVE *institut. medic.* §. 1027.

x) STAHL *de mutatione temperamentorum.*

optimae medendi methodo conuenire videtur, in palliatia morborum haereditariorum curatione, iisdem vti remediis, quae ars, in similibus morbis adscititiis, commendat, ad mitigandam symptomatum vehementiam. Quo minus autem, in specialem atque vniuersalem haereditariorum morborum therapiam nosmet ipsos diffundamus: argumenti vbertas nostrumque breuitatis studium prohibent; quum in primis non desint viri, qui hac in parte, philiatrorum desideriis, ex arte satisfacere possint.

§. CII.

Equidem multa adhuc occurrere video, quae aut obscura incertaque, aut manca et imperfecta, nonnulli iudicabunt: spero tamen, eorum me consequuturum indulgentiam, qui huius argumenti difficultatem perspiciunt. Operae quidem praeium esset, vt, propter argumenti similitudinem, in ipsum *peccatum originale*, quoad eius vis et effectus, in corpus etiam humanum, sanitatem, morbosque, semet extendit, inquirere, videreque, an *variolae*, quod quibusdam placere video, originariae animae labis praesentiam testentur. Sed, quia, quae in generatione hominis iuxta atque conceptione, contingant, oculatissima ingenia, perspicere nondum potuerunt: superuacanea nostra opera, vt arbitror, foret; si ex iis, quae incerta dubiaque sunt, veritatem elicere vellemus. Superest amplius nihil, quam, vt supremum NUMEN, cuius nutu atque auspicio, hunc, qualiscunque sit, laborem, perficere licuit, animo venerer deotissimo; menteque rogem supplici, velit, praesentibus hisce futurisque conatibus meis, benigne fauere, neque omnino plane irritos esse.



Nil opus est multis, dabit ars sua proemia, curis;
 Ac sua merces erit. **TE** patria anhelat, opemque
 Auxiliumque **Tvum** implorat et anxia quaerit.
 Praesta **TE** cunctis, hominemque Deumque, medendo.
 Vtere sorte **Tva**; peragas feliciter artem.
 Sis **Tibi**, sis patriae, decus immortale, quod optat

Scrib. Iena
 A. R. S.
 clb lccc LVIII.
 Cal. Oct.

*Viro Nobilissimo atque Doctissimo, in arte
 salutari, summos honores ambiēti, amico
 suo, omni obseruantia colendo; seque in
 amicitiam constantem commendat*
GABRIEL INSTITORIS MOSSOCZY
 Gyöngyössi Hungarus
 SS. Th. et Ph. St.

Tv patiare vilem, redimitus tempora Phoebō,
 Inter florentes hederam **Tibi** serpere lauros.
 Gloria **TE** maneat, **Tva** laus nomenque perennet;
 Atque **Tvis** votis aequalia fata rependat.
 Numen supremum **Tva** tum conata secundet.
 I decus omne **Tvis**; morbis patriamque leuato;
 Atque **Devs** faxit, **Tibi** vt insanabile nil sit.

Scribebam Iena
 A. R. S.
 clb lccc LVIII.
 II. Cal. Oct.

*Quod Clarissimo Doctorando, amico
 suo aestumatissimo, pectore candi-
 dissimo, precatur*
MICHAEL CYRILLI
 Bartfa Hungarus
 S. S. Th. et Phil. Stud.



SPECTABILI AC MAGNIFICO DOMINO

GEORGIO DE RADVAN

HAEREDITARIO DOMINO

IN RADVAN SZKVBIN ET MALACHO ETC. ETC.

SACRAE CAESAREAE REGIAEQVE MAIESTATIS

CONSILIARIO INTIMO

NONNVLLORVM INCLYTORVM COMITATVVM

REGNI HVNGARIAE

ADSESSORI PRIMARIO

NEC NON

SPECTABILI AC MAGNIFICO DOMINO

LADISLAO DE RADVAN

HAEREDITARIO DOMINO

IN RADVAN SZKVBIN MALACHO ET KAZA CET.

QVORVNDAM INCLYTORVM COMITATVVM

REGNI HVNGARIAE

ADSESSORI PRIMARIO

FRATRIBVS GERMANIS



NON MINVS
ANTIQVITATE GENERIS
VIRTUTE
GLORIAQVE MAIORVM SPLENDIDISSIMI
QVAM
PIETATE IN DEVM REGEMQVE
FIDE IN PATRIAM
AMORE DENIQUE IN ARTES ET LITTERAS
CLARISSIMIS
LITTERARVM PATRONIS ET MAECENATIBVS
INDVLGENTISSIMIS
DISSERTATIONEM HANC INAUGVRALEM
MENTE DEVOTISSIMA
D. D.
A V C T O R.

SPECTABILES AC MAGNIFICI DOMINI

Non dubito plerosque fore, qui me audacem, nisi etiam impudicum iudicent, qui clarissimis nominibus VESTRIS, vilissimum scribendi, genus, quodue amplitudini VESTRAE, minus conuenire videtur, inscribere non dubitarim. Ac, fateor quidem, institutum meum, mihimet ipsi, paulo audacius videri; partim, quod argumentum hocce, magis fortasse a studiis, quam ingeniis VESTRIS abhorret; partim, quod, nulla adhuc ratione, VOBIS innotui: tamen, quum pro comperto habeam, quanto studio, quanta liberalitate, artes et scientias Reipublicae vtilis, alere, fouere et promouere studeatis; partum huncce ingenii mei, licet non omni ex parte, perfectum et absolutum, meliore iure, nemini, quam VOBIS MAGNIFICI DOMINI, me consecraturum arbitrabar. Quis enim VOBIS, seu generis antiquitate, seu domi militiaeque praeclare gestorum gloria, siue sapientiae virtutisque amore, antefendus est? Virtute et clavis facinoribus, maiores VESTRI, illam nominis dignitatem, consequuti sunt, quam in VOBIS adhuc, cuncta Hungaria admiratur, quamue vos, a maioribus haereditate acceptam, per tot saeculorum decursum, non modo conseruastis, verum etiam, multis accessionibus, plurimum auxistis;

vt ambiguum videatur, an illis, maior partae digni-
tatis, quam VOBIS, inter tot tantasque fluctuantis
fortunae vicissitudines, retentae gloria conueniat.
Sed, tanto lubentius, celebrandis laudibus VESTRIS,
superfedebo; quanto certius constat, hanc VOBIS
virtuosis gloriam, omnium bonorum consensu, cle-
mentique Augustissimorum Imperatorum et Diuorum
Hungariae Regum iudicio, attributam esse. Patiamini
igitur, SPECTABILES AC MAGNIFICI DOMINI,
dissertationem hanc, clarissima nomina VESTRA, in
fronte gerere, tantorumque nominum titulis super-
bire. Quam, etsi non eam esse sciam, quae ampliis-
simis nominibus VESTRIS satis sit conueniens: te-
stis tamen erit publicus, VESTRI in litterarum stu-
dia amoris et beneficentiae. Quamobrem, opus hoc
meum, GRATIOSI MAECENATES, serena, vt sole-
tis, fronte, excipite, non munusculi huius pretium,
quod sentio, quam sit exiguum, sed potius animum
VESTRI obseruantissimum aestumantes. Id si impe-
traro: minus me terrebunt eorum iudicia, quibus
nil, nisi, quod nouitatem sapit, et a viris maximi
nominis profectum est, dignum lectu videtur. Quod
reliquum est, seruet VOS DEVS O. M. vna cum
splendidissima familia VESTRA, saluos atque incolu-
mes, diutissime; addatque maiora in dies, splendo-
ris, gloriae ac felicitatis incrementa. Scribe-
bam Erlangae A. R. S. 10 10 cc LVIII.

III. Cal. Octobr.

